

六藝之一錄

百六八

六藝之一錄

卷八

總校官檢討臣何思鈞

校對官助教臣胡予襄

謄錄監生臣吳三承

欽定四庫全書

六藝之一錄卷三百八十六

錢唐倪濤撰

歷朝書譜七十六

明賢墨蹟

詩翰

宋仲溫詩帖

秋日懷兄弟

秋至轉相憶蕭蕭木落初如何去鄉國不見有音書漂
泊全無定存亡半是虛風塵幾時靖還似昔同居

相別幾多時相思淚滿衣家貧經難久世亂得書稀作
吏誠全拙從軍事亦非鄉心秋塞雁盡日向南飛

懷何孝廉

絕憐何有道老節獨居貧孝義今誰及交情久更真清
齋將十載小隱欲終身別後音書斷相思入夢頻
清
明前五日宋克書舊詩三首

宋仲溫酬南宮生七言絕句

昨夕端察時雍村人念其非誑心者則此機會之失當

有無涯之憾用敢步來韻再贅下憤作三絕奉去用道
求之之難而失之之易以增重其所當快悵使不釋然
於懷而將有所歸咎也幸勿以草惡見擲是望

短牆荒徑倚名花游客春來感興賒何事東風不相惜
盡吹香艷落田家

和韻

夢落揚州二十年傾城消息竟茫然如今幸識春風面
又作來生未了緣

紅塵綠鬢送流光四十風情尚渺茫雲雨高唐元是夢

後人空自說襄王 克

高季迪青邱子惜花歎

惜花不是愛花嬌
賴得花朝伴寂寥
樹樹長懸鈴索護
叢叢頻引鹿盧澆
幾回欲折花枝嗅
心恐花傷復停手
每來花下每題詩
不到花前不持酒
準擬看花直盡春
春今未盡已愁人
纔留片夢依前砌
全落千英過別隣
懊恨園中妬花女
畫幙不禁狂風雨
流水殘香一夜空
黃鸝魂斷無言語
縱有星星在繡衣
拾來已覺損光輝

只應獨背東窓卧夢裏相隨高下飛
榘軒高啟

劉伯序秩題留春軒詩

時人看花為花好我獨看花被花惱
含英結蕊須幾時
殞紫飄紅如一掃
人生少小難老成
纔得老成易枯槁
寄言年少好看花
莫待花殘須及早
花殘畢竟有開時
人老此生難再造
何當別置留春軒
長使花開人不老

陳文東璧與時中詩簡

陳文東謹奉書時中節判宗兄孝次近家信至云尊公

下世而吾兄遠迴區區雖在千里病未能興不覺悲喜
交集始兄除授時得書為慰後二年僕承乏解州因有
州人送徒至成都之便亦嘗令附狀僕以丁艱東奔竟
不知沈浮相別六年之間出處凶變各如此可為悽斷
去歲春初期兄必迴冀得一見兄何為淹許時耶日來
孝履何似繼聞兩至舍下存問尤見情至僕病兩月甫
及愈而司銓者呼入選意者造物使之然耶賦得一詩
為寄并在解州時與前歲期待各一首茲并寫上亦以

見僕不敢忘故交耳

五年不見威州倅萬里遙遙有所思亦幸歸來那忍語
人生出處正難期進牌方愧天官選卧病誰憐送族悲
昨夜得書渾不寐枕邊聊詠寄君詩

解州官舍夢後一首

惜昔君為萬里遊今年我亦應徵求夜來夢裏驚相見
半說威州與解州

期兄迴一首

君家頃有故遠宦亦應歸萬里關山遠三年消息稀寄
書多不達對酒惜長違相見翻成泣春風定挽衣 茲
因子盛還謹具此為問尚惟節哀是愛八月初或當遠
離無吝示及動靜以慰瞻企力書不盡文東奉書凡見
鄉中諸友幸為我一謝之病餘未能遍作書耳顧文
照附此致意七月廿一日

周履道詩簡

對春雪一首

璫葉綴玄圃玉羽翔伊川翻靈九霄下呈芳二月前低
徊隔簾翠玲瓏入綺錢欲消不自駐已斷復成連珠幃
凝華潔花池舞影妍相思梁園暮曾賞洛城年

昨日賦得此詩寫奉元度孝廉一笑王成老蘇刻還致
二本餘以五鐶送之復其原值也望徹之春寒佳否砥
再拜初月十七日梅花有便索一枝見惠甚佳砥

周履道詩帖

言甘知有吝味肯閑其多居恒屬念慮抱朴心靡他淳

風返元化至體適平和意勝惟自然道存諒不磨營營
彼澆俗機巧滋煩苛身偕百慮長奄忽其奈何 尚朴
齋一首

貧富不相直衰榮固有時行哉徒自速止尼未為遲崎
嶇千萬塗辛苦豈要辭風雨羣雞鳴壞屋起晨炊一日
不解醉千古有遺悲如何屠釣人敢為帝者師 風雨
一首用高季迪韻

立世守茲道毅然生死間奄去同其盡榮辱豈相關若

人固可悲弔溺吾所艱蕭瑟見遺墨風雨慘容顏秦唐
去我遠二李無時還世傳斯有在邈哉不可攀 題吾
子行遺墨後

休沐出自旦騰步非所樂偶茲芸閣賞得遂中林約朱
輪交廣衢綺麗涉紛錯寧復知閒燕飛蘿散雲壑池魚
可以觀幽蘭可以握金題耀綳帙粉墨間揮霍覽物千
古上興謠契冥冥縱縱不復云悠悠付觴酌朋簪既已
盡善戲不為虐志適孤興遠物遣萬慮薄於世本何資

逍遙每恒若行矣空谷深撫心慚場藿 芸閣讌集得

壑字

日暮登高臺浮雲結遠陰樹木何蒙籠野雀噪繁林驅
車涉關塞岐路鬱且深借問子何之故鄉阻崎嶇曷不
暫栖息蓬藿非所任隱憫意不發威遲既前臨脆管促
飛觴鵬絃奮逸音仗劍從此別秋風滿懷襟寡力步非
窘薄遊志不沈策馬欲俱去我無當世心 贈葉秀才

一首

大江洪流若奔馬橫截中天向東寫吳楚風煙浩蕩中
海門赤日光相射上將氣吞雲夢澤猛士聲震長平瓦
靈旗遙指濠泗間神戈暫駐狼山下萬民不擾農業興
白叟黃童在田野文武之道惟張弛固識賢才天所假
去年開閫今復來歡呼動地聲如雷願翻長江作霖雨
沛澤何止沾枯荄我欽當時羊叔子峴山之碑傳未已
清德九世其在君緩帶輕裘自茲始 送淮南蘇同僉
赴鎮

渺渺晴湖白鷺飛青山迢遞夕嵐微閒操桂楫雲生腋
欲采芙蓉露滿衣紫翠房深丹竈暖松杉秋靜鶴巢稀
明年去覓封君達應駕青牛說息機送趙一陽真士
歸雲上

松花金粉落春晴白鶴看棋如客行疎雨竹窓緣是夢
隔林茶臼只聞聲繁華久困心何得澹泊相遭思亦清
不有鹿門高世志山中幾日道能成次韻介之夢山
中